

## 01

### 列女操

梧桐相待老，鸳鸯会双死。  
贞妇贵徇夫，舍生亦如此。  
波澜誓不起，妾心井中（一作古井）水。

## 02

### 小隐吟

我饮不在醉，我欢长寂然。  
酌溪四五盏，听弹两三弦。  
鍊性静栖白，（一作日）洗情深寄玄。（一作塞渊）  
号怒路傍子，贪败不贪全。

## 03

### 长安羁旅行

十日一理发，每梳飞旅尘。  
三旬九过饮，每食唯旧贫。  
万物皆及时，独余不觉春。  
失名谁肯访，得意争相亲。  
直木有恬翼，静流无躁鳞。  
始知喧竞场，莫处君子身。  
野策藤竹轻，山蔬薇蕨新。  
潜歌归去来，事外风景真。

## 04

### 求仙曲

仙教生为门，仙宗静为根。  
持心若（一作苦）妄求，服食安足论。  
铲惑有灵药，饵真成本源。  
自当出尘网，驭凤登（一作升）昆崙。

## 05

### 择友

兽中有人性，形异遭人隔。  
人中有兽心，几人能真识。  
古人形似兽，皆有大圣德。

今人表似人，兽心安可测。  
虽笑未必和，虽哭未必戚。  
面结口头交，肚里生荆棘。  
好人常直道，不顺世间逆。  
恶人巧谄多，非义苟且得。  
若是效真人，坚心如铁石。  
不谄亦不欺，不奢复不溺。  
面无吝色容，心无诈忧惕。  
君子大道人，朝夕恒的的。

## 06

### 招文士饮

曹刘不免死，谁敢负年华。  
文士莫辞酒，诗人命属花。  
退之如放逐，李白自矜誇。  
万古忽将似，一朝同叹嗟。  
何言天道正，独使地形斜。  
南士愁多病，北人悲去家。  
梅芳已流管，柳色未藏鸦。  
相劝罢吟雪，相从愁饮霞。  
醒时不可过，愁海浩无涯。

## 07

### 饥雪吟

饥乌夜相啄，疮声互悲鸣。  
冰肠一直刀，天杀无曲情。  
大雪压梧桐，折柴堕峥嵘。  
安知鸾凤巢，不与枭鸱倾。  
下有幸灾儿，拾遗多新争。  
但求彼失所，但誇此（一作誇诞自）经营。  
君子亦拾遗，拾遗非拾名。  
将补鸾凤巢，免与枭鸱并。  
因为饥雪吟，至晓竟（一作意）不平。

## 08

### 夜集汝州郡斋听陆僧辩弹琴

康乐宠词客，清宵意无穷。  
徵文北山（一作窗）外，借月南楼中。  
千里愁并尽，（一作寂然静）一樽欢暂同。  
胡为夏楚琴，（一作瑟）淅沥起寒风。

## 09

### 与二三友秋宵会话清上人院 其一

何处山不幽，此中情又别。  
一僧敲一磬，七子吟秋月。  
激石泉韵清，寄枝风啸咽。  
泠然诸境静，顿觉浮累灭。  
扣寂兼探真，通宵讵能辍。

## 10

### 题从叔述灵岩山壁

换却世上心，独起山中情。  
露衣凉且鲜，云策高复轻。  
喜见夏日来，变为松景清。  
每将逍遥听，不厌飕飕声。  
远念尘末宗，未疏俗间名。  
桂枝（一作科）妄举手，（一作意）萍路空劳生。  
仰谢开净弦，相招时一鸣。

## 11

### 归信

泪墨洒为书，将寄万里亲。  
书去魂亦去，兀然空一身。

## 12

### 达士

四时如逝水，百川皆东波。  
青春去不还，（一作回）白发镊更多。  
达人识元化，（一作气）变愁为高歌。  
倾产取一醉，富者奈贫何。  
君看土中宅，富贵（一作已矣）无偏颇。

---